



*Selasa, 21 Januari 2025*  
**Ogen: Pengerana 5:19**



**Ermeriah Ukur**



W Gundari uga maka meriah ukurta bage lah sibahan.” Kata-kata enda mekatep sibegi. Keriahen ukur e jadi sada si idarami ras iusahaken jadi i bas kegeluhen. I bas Kuan-kuanen 17:22 ngatakan maka keriahen desken tambar si mereken kejuah-juahen. Ertina kalak si mejuah-juah e me kalak si meriah ukurna.

Enggo 20 wari sidalani tahun 2025 enda, erbage si enggo ibentasi, benaken i bas tahun enda banci meriah kel ukurta erkiteken sigejapken enggo sibentasi tahun 2024. Erbage cara guna ncidahkan keriahen ukur, lit deba pulung ras keluarga, teman meriah, ibahan pesta kembang api, man pangan sientabeh-ntabeh, gawah-gawah ras sidebanna. Kenca si e lesap nge keriahen ukur ndai?

Situhuna keriahen ukur labo terjeng i bas waktu-watu tertentu saja (moment-moment khusus) tapi arusna jadi bagin si laterpesirang i bas geluhta nari. Ermeriah ukur katarawi pe nina Paulus, janah kitap pengerana pe ngatakan maka kita enggo ngaloken kebaken ras erta bas Dibata nari, tugasta ngatakan bujur dengen ermeriah ukur ngenanami ulih latih. Payo tuhu lit i babo doni enda lanai ngasup ngenanami ulih latih, dahin terjeng mpepulung, mpepulung ras mpepulung ulih latih. La erbias-bias, la lit kata cukup. Maun ikatakenna maka i datas langit lit denga langit. La lit balengna, la lit puasna. Seh ndigan ateta si e jadi i bas kegeluhen enda? Tuhu lit ka nge deba si la ulih latihna e pe atena inanamina. Enda pe kurang nge jorena. Paksa teneng enda ukuri dage uga enggo buena pemere Dibata e nandangi kegeluhenta ras uga enggo perbahenta nandangi pemere Dibata e? Ula min sempat tarum ngayak-ngayakin si langa dat erbahanca kita lanai ngasup ngenanami ras ngeriahken kai sienggo idatken. Riahkenlah uga litna ras tetap ngatakan bujur.

☞ *“Keriahen e sekerajangenta kap, nanamilah”*

